

COMUNICÂT PE STAMPE

Doi cors di furlan in lenghe inglese e spagnole pai utents ator pal mont

Creâ un puint tra il Friûl e lis comunitâts di emigrâts tal forest e i lôr dissidents, metint a disposizion un strument par imparâ la lenghe ma soledut ufrint une oportunitât par scoltâ il furlan e par esercitâsi a fevelâlu.

Al è chest un dai obietifs de prime edizion dai doi cors gratuits di lenghe furlane presentâts îr dopomisdì inte conference stampe a Palaç Mantica a Udin e metûts in pôts de Societât Filologjiche Furlane, cul finanziament de Agenzie Regionâl pe Lenghe Furlane e in colaborazion cul Ent Friûl intal Mont.

Presints il president de Societât Filologjiche Furlane, Federico Vicario, il president de ARLeF, Eros Cisilino e il neopresident di Ente Friuli nel Mondo, Franco Iacop.

Il president de Filologjiche, puartant il salût dal assessôr regionâl Pierpaolo Roberti, al à ricuardât che la tradizion dai cors pratics e à lidris che a van indaûr aes iniziativis puartadis indenant, passe 40 agns indaûr, di Aurelio Cantoni (Lelo Cjanton) e, ancjemò prime, intai agns Sessante, dai insegnants e dai predi di Scuele libare furlane.

Franco Iacop, president di Ente Friuli nel Mondo, al à marcât che la propueste dai cors multimediâi in lenghe inglese e spagnole e darà la pussibilitât di slargjâ la ufierte a un bacin plui larc di fruitôrs. Cun di plui, al à ricuardât il grant numar di personis “tal forest” che a varessin gust di svicinâsi ae lenghe furlane, ma che no cognossin il talian, uniche lenghe veicolâr fin cumò doprade intai cors in linie. Cun cheste iniziative, invezit, e sarà une oportunitât in plui, in grazie de Societât Filologjiche Furlane e de ARLeF, che a àn metût in cantîr chescj doi percors, dal sigûr di cualitât, che disfrutant lis tecnologiis a permetin a utents di dut il mont e cun fûs oraris diviers di cjatâsi e di podê frequentâ lis lezioms.

Eros Cisilino, president de ARLeF, al à marcât che chestis iniziativis a puedin existi in grazie di figuris professionâls che a dan vite ai cors, a nivel di contignûts, ma ancje par ce che al tocje la logjistiche. Jessi presints in diviers lûcs dal mont e in diviers oraris, al rapresenterà dal sigûr une biele disfide, cuntune propueste formative dal dut diferente di chê che e jere stade metude in pôts fin cumò, ma si podarà rivâ a chest obietif ancje in grazie de colaborazion di Ente Friuli nel Mondo, di mût di rivâ a ducj i fogolârs, che a son pardabon ambassadis di lenghe e culture furlane tal forest.

Po dopo e je intervignude la dotore Ada Biêr, responsabile científiche dai cors pratics in linie, che e à presentât la struture e i contignûts dai doi cors, organizâts daûr dal nivel base (A1) dal Cuadri comun european di riferiment pes lenghis.

A tacâ des 9 di buinore dai 28 di Otubar dal 2024, intal specific, al vignarà ativât il “Basic course of Friulian language”, destinât a un public di lenghe inglese, soledut par chei che si cjatin intai Stâts Unîts, Canadà o Australie (ma ancje par chei che a doprin l’inglês tant che lenghe francje e a varessin gust di svicinâsi al furlan), intant che ai 29 di Otubar, aes 5 daspò misdì, e vignarà fate la presentazion dal “Curso básico di lengua furlane”, in lenghe spagnole, cun target specific i utents de Americhe Latine.

Il percors formatif al varà une durade di dîs setemanis, li che i corsiscj a podaran cognossi lis regulis di base de grafie e de gramatiche furlane, cence dismenteâ i elements fundamentâi pe comunicazion, adun cun curiositâts e mûts di dî doprâts in Friûl.

Si pues partecipâ a dutis lis lezioms in maniere asincrone. Ogni unitât e je structurade intune prime part dedicade ae scolte, cuntun audio di podê tornâ a scoltâ e cu la pussibilitât di esercitâsi intal tornâ a pronunziâ lis frasis, ancje in grazie dal test dai dialics di podê scjariâ tra i materiâi. Ae

fin, e je previodude une prove di comprehension orâl. Intune seconde sezion, il student al cjatarà i videos là che i tutors a sclarissin lis regulis gramaticâls, doprant la lenghe furlane e la lenghe veicolâr dal cors. Simpri presint l'aprofondiment comunicatîf, par imparâ in maniere graduâl a esprimisi te juste maniere in lenghe furlane (dai salûts e presentations, aes ativitâts vie pe zornade, fin a descrivi la famee, orientâsi intai lûcs, ordenâ al ristorante o contâ ce che si fâs tal timp libar). Ducj i materiâi presentâts dilunc des videolezions a son a disposizion in formât PDF inte sezion di pueste. Par podê acedi aes setemanis seguitivis bisugne scjariâ la schede dai esercizi e completâle, di mût di podê visualizâ la soluzion dai esercizi e confrontâle cun ce che si à fat, intune autovalutazion dal propri apprendiment.

Vie par dut il percors, al sarà simpri pussibil domandâ sclariments midiant dal forum di pueste ai diviers tutors (Ada Bier e Elena De Sanctis pe lenghe spagnole, Michele Calligaris e Serena Fogolini pe lenghe inglese), che i corsiscj “a cjataran”, ancje se dome in modalitât virtuâl, intai sportei di conversazion, là che a varan la ocasion par esercitâsi sedi inte scolte che intal dialic.

I modui pe iscrizion a son a disposizion inte sezion “Lenghe furlane” dal sît de Societât Filologjiche Furlane, a chest leam: <https://www.filologicafriulana.it/corso-pratico-on-line/>

Par informazions e prenotazioni, si pues contatâ la referente de formazion, dotore Elena De Sanctis, clamant il numar 0432 501598, interni 3, o scrivint a formazione@filologicafriulana.it.

Udin, ai 21 di Otubar dal 2024